



Aqqalu C. Jerimiassen

UKA 2023/7\_1

Atassut

26. september 2022

## **2024-imut aningaasanut inatsisissatut siunnersuut.**

### **Aningaasaqarnermut Naalakkersuisoq**

Kikkut sullinniarlugit maanna aningaasaqarnerput aallartinniarparput?

Aningaasalersuinerinnarnik aningaasartuutinillu siunnerfeqarluta aallartinniarpugut?

Namminersortortattaluunniit siuarsaaviineqarnissaanut aallariaqqinnissamut piareersimanerpugut?

Pisortat suliffeqarfiutaasa namminersortortatsinnut sakkortunerpaaffissaanik maanna unammillileruttorfianni isiginngitsuusaartuarneq naammalerunaraluarpoq.

Aallartinnermi inatsisissap siullermeerneqarnerani Atassummiit qulequtaararpassuarnik saqqummiussuutaraluarpugut, taamaattorli maanna naatsukullammik saqqummiussaqaassalluta aaliangiusimavarput.

Naalakkersuisooqatigiimmi amerlanerussuteqarluartumik inissisimasut, inatsisissap aappassaaneerneqannginnermi qanoq naapingiuteqatigisinnaanissaat tusaqqaalaarusunnarmat.

Atassummiillu pissanngatigaarputtaaq, Aningaasaqarnermut naalakkersuisoqarfiup nutaamik inuttalerneqarnera, tassanilu isumaqatiginninniarniq naapigiaarususeqarnerlu qanoq ittoq atorneqarniarnersoq.

Naalakkersuisooqataasut illuatungiliuttuunermi utoqqartatsinnut soraarnerussutisiat akileraarutaarunnissaat suaarutigisimavaat, tassanilu Atassummiit assortunngivipagut, aammami tamanna nammineq anguniagarereeratsiguttaaq. Aningaasaqarnermut naalakkersuisoqarfik Siumukkut paarileriamassuk maanna, atagu isumalluarsinnaanerluta piffissaanersoq takussuarput, tassami soraarnerussutisiat akileraarutaarunnissaannut oqariartuutaannut tapersingaarnikuugatsigit, taamannak iliuuseqassappata akerlileerianngivilluta suleqataanissarput isaatissagaluaratsigu.

Takisoorsuarmik oqaaseqanngikkallarpugut, taamaattorli Aningaasaqarnermut Naalakkersuisumut siunnersuutip aappassaaneerneqannginnerani kissaatigut allaganngorlugit apuukkumaarpagut, taamatuttaarlu aappassaaneerneqarluni saqqummiuneqaleriarpat erseqqinnerusumik oqariartuuteqarumaarluta.

Taamatut Atassummiit naatsukullammik oqaaseqarluta, siunnersuut aappassaaneerneqartigani aningaasaqarnermut akileraartarnermullu ataatsimiitsitaliamut ingerlaqqissasoq innersuupparput.